

SANTIACON DADA UAID

¹ Santiacono nebi. Nuquin Papan namiaidquio, Nuquin Icbo Esuquidistun namiaidquiobidi nebi. Adquid yec Esus tantiaquido uano nidaniash tabadquido mibi tantiec tsadebi. Aden tantiaquin dada uaimbique. Isec onqueta.

Natiametequid

² Utsibo, mibi u tabadnuc mibi nēnaid, mibi bundoaid, utsin mibi mëyanaid, mibi natiametequid utsi-utsiec iquendac. Adaid icnuc, chonoadbudec cuishon quec, Chieshenquiocquin nainembi, quiacpadquiec adecbidi tabadoata.

³ Adaid icnuc, ¿Ĕbi tantiaquidquioda neque? Isnu, quequin, Nuquin Papan ěbi dayacquio icmec, quequin tantiec adecbidi tabadoata.

⁴ Aden tantiec tabadsho isun bēdamboec tabadte uesquin tantiabenquidquio mibi icmendac ma Esuquidistupadquid yampanueshun.

⁵ Mimbi tantienquio yaid Nuquin Papa chuita. Aden chiaquien, Ma tantianu, qeshun mibi nua pausunec Nuquin Papan. Icsambocquid mibi neque. Padi quenquiocquin mibi pausunec.

⁶ Ĕbi tantieme, queboedi, ěbi tantiamenquiocpec quequin tantienda. Ĕbi tantiemepec queboedi padenquio yanec cuēshēdec capuidequi yamec.

⁷ Adquid Nuquin Icbon pausuntiapimbo icpec.

⁸ Adquid, Nuquin Papan ěbi tantiamec, queboedi capuidequi icquidbimboec icpec.

9 Shubu abentsëquën tabadacpadquiec tabadquid icta. Adec tabadec mitsana daëdpactsëc icquid yec, Con na daëdpactsëc iquec, quequin mitsanauidi tantienquiocquin naden tantiata. Nuquin Papan bacuë nebi. Abëdi cuëshëdenquio yec tabadebi, quequin aiduidtsëqui tantiec tabadteneta. ¹⁰ Aton na dadpen icquidombien aton na bëdiactsec tantiaquin naden tantiendac: Con na nëidic chodquec; utsibic chiuidec. Adecbidi con nami shënibudequi Nuquin Papan bacuë nebi. Abëdi cuëshëdenquio yec tabadebi quequin tantiec tabadta. ¹¹ Tanunquiocquidën tiedën caniquid unësec podò tididiquec. Bëdambochoedi nibëdquiec. Adquiecbidi icbo aton nabi bedbanequi aton nami shënibudequi unësec. Icho icboedi icbo ictiapimbo yanec. Adec icbo ictiapimbo yanebi, quequin mitsana comapenen tantienda.

¹² Adecbidi natiaic shubitequid icnuc Nuquin Papan chiaid niaquenquio yec dayacquio yec tabadquid Nuquin Papan bëdambo icmiaid nendac. Adquiecbidi, Ęmbi chiaid niaquenquio yec mibi tabadsho isembi. Ębëd icquid mibi neque. Pudued. Nëuëshquio mibi unëstiapimbo iquec, quendac Nuquin Papa. ¹³ Mibibi icsash, Nuquin Papan namiac nebi, quenda. Nuquin Papa Icsapenquiocquid nec. Aidi icsa uantiapimbo iquec. Icsa uanesa nec. ¹⁴ Nidaidën tabadquidien ic-sate bunec abibi icsaic. Adecbidi ambibi tantiacpadec icsaoaic. ¹⁵ Icsamane quequin tantienquio yec unësacsho abi yacno puduedmenquiocquin Nuquin Papan uquë nësecaindac adquid.

¹⁶ Utsibo, Nuquin Papan chiaid chieshënesa

nebi, quec mibibi mua uadenda. ¹⁷ Nuquin Papan pausunaid bēdambouidi iquec. Utsi uaquin namiantiapimbo iquec. Adenuidi namec. Adquiouidi Nuquin Papa iquec. ¹⁸ Ĕmbi chiaid tantiaquidquo icsho con bacuē nec, caimbi, quequin Nuquin Papan tantiampampic. Aden tantiaquin Nuquin Papan abi chuidonequidquo aton Mado Esus nidaidēn budmepadene. Adec budash nidaidēn capusho isash abēd icboedo abi tantiaquido nuquitedi nec. Adquid icsho ambi bēyuc bacuē icmiaido, con nabo cain, Nuquin Papan cuēmbanoshi. Aden ambi bēyuc bacuē uaido icquin chuibanac ma tantiaquidquo dadpen yampanuna.

Nuquin Papan chiaid tantiaquin nabanta quiaid

¹⁹ Nēid bēdamboen tantiata. Chuinu. Nuquin Papan chiaid bēdamboen tantiaquid icta. Ambi chiaid bēdamboen tantienquiocquin aid badedquo chienda. Adechidi badedquo nēishenda. ²⁰ Badedquo nēishquidēn Nuquin Papan chiacpadquiec bēdamboec tabadaid ismesa nec. Adquid, Bēdamboen mimbi naoc, Nuquin Papan catiapimbo iquec. ²¹ Bēdamboec tabadesa icquin mimbi icsamboen tantiacpaden naid ēnquiota. Aden ēnu quiash, Icsaobique. Mimbi chiaid tantiaquiono. Ĕbi pausun, quequin Nuquin Papa chui. Aden chuisho Nuquin Papan mibi pausunec. Ambi pausunaid iquec aton Mado Esuspadquo yec cuēshēdenquo yec abēdi mibi iquendac.

²² Nuquin Papan chiaid tantiashun nainquo yequi Nuquin Papan chiaid bēdambo iquec,

quec mibibi mua uadenda. Nuquin Papan chiaid tantiabocpadomboen nabanta. ²³ Nuquin Papan chiaid tantiashun naisa isnanten ²⁴ bëisadash bëpiscudacbimboec bëpiscudendac. ²⁵ Padnuen Nuquin Papan nëbi chuiboed utsin comapenen tantiaded-tantiadedec. Aden tantiashun, Con Mado Esuquidistu tantiaquid con bacuë caimbi, quequin Nuquin Icbon chiacpadomboen nabanec tantesa uainquiocquid adquid nendac. Aden tantiaquin nabanquid Nuquin Papan bëdambo icmendac. ²⁶ Padnuen, Nuquin Papan chiaid tantiaquid nebi, queboedi ana bëdamboen oncamesa abibi onquequid nec. Adquid, Esus tantiaquid nebi, quequin ambibi tantiaquin icsamboen chuiquid nec. Abipenquio chuiquid nec. Adquidbidi bëdamboec tabadaid ismesa nec. ²⁷ Nuquin Papan chiaid tantiaquid nebi, quequin utsi tantiaquin nashuntiad. Menampibo caniabictsëcquid chonoadsho isun nashuntiad. Natiaic camiaid icsho isun adembidi nashunoatiad. Adembidi shiadimpi machoabictsëcquido tantiaquin nashunoatiad. Adembidi niante machobo utsin bedabi samëdquido tantiaquin nashunoatiad. Aden naquid Esus tantiesan nabanacpaden naisa nendac. Adquid icsho isash, Ęmbi chiaid tantiaquin naquidquio nec. Con Madopadquidquio icsaisa nec, quendac Nuquin Papa.

2

Nëid bëdambo iquec. Nëidien icsambo iquec, quesa icta quiaid

¹ Utsibo, Nuquin Icbo Esuquidistu Bëdaidquio nec. Aid tantiaquid mibi nec. Adquid icquin, Nëid bëdambo iquec. Nëidien icsambo iquec, quenquiocquin icsamboen nainquiocta.

² Mibi iccuededacno Esus tantiaquid mimbi isacmaid choec. Abentsëc bëdaidquio dasiuidash nac-nacquiocquid mësiuidquid puduednubien utsi icsactsëcquiocquid dasiuidtsash puduedec. Aid daëd chosho isun ¿mitsipadentsi mimbi tantiapatsia? ³ Bëdaidquio dasiuidquid isun naden mimbi tantiatasiac: Bëdambocquid nec. Aton na dadpen icquid nec, quiachimboen, Tsusion dayunquio tsadec cho, quequin mimbi aidi tsadumpec. Adshumbic, icsactsëcquiocquid dasiuidquid isun, Aton nain nibëdchitec, quiachimboen uano tsad mimbi caoapec. ⁴ ¿Nëid icsambocquid nec. Nëidien bëdambocquid nec, quiachimboen Esus tantiaquid utsibo mimbi tsadunenquioda ictio? ¿Aton na tantiaquin adoenquioda ictio? Aden naquin bëdamboen tantiaquin naisa mibi neyoc.

⁵ Nuquin Papan chiaid tantiesabimboecquin mimbi naid nec. Mimbi, Icsambocquid nec, quequin tantiaquin uano tsad caid tsadbudash nadpec: Icsambocquid nec, quequin ëbi isec, quequin tantiec aidi tsadpec. Aidbidi Nuquin Papan tantiaid nec. Aidi Esus tantiaquid yec abi yacno puduedtequid iquendac. ⁶ Aidi bacuëbimboecnuc mimbi uano tsadumpec. ¿Utsibic tsusio dapabimboecnuc mimbi dayunquio tsadumbocpadquidën utsin-utsinquien chono uashun mibi daëdpactsëc menenquioda ictiosh? ¿Adquidon mua uain chuiquin mibi utsi-utsien quënën nauedmenquioda ictiosh? ⁷ ¿Adoanquidën

baded-badedquien Esus quec onquequin
mamënshunenquioda ictiosh?

⁸ Nuquin Papan chiaid nad iquec: “Utsin naden ëbi nashuntiadquio iquec quequin, mimbi tantiacpadomboen nashunta.” Nuquin Papan chiacpadomboen tantiaquin nashunquidquio iquec mibi bëdambo icpec. ⁹ Nëid bëdambo iquec. Nëidien icsambo iquec, quiacbimboen naquid icnuc Nuquin Papan chiaid niacquid mibi iquec. ¹⁰ Nuquin Papan chiaid utsi-utsien nabanquid icquimbi ambi chiaid utsi niacquid mibi icoapec. ¹¹ “Mimbi inacmaid chudenda,” quequin Nuquin Papan chiaid nec. “Utsi cuesunenda,” quequin ambi chiaid utsi nec. Min chidouidi chudquid icquimbi utsi cuesunquid mibi iquec Nuquin Papan chiaid niacquid mibi nepec.

¹² Mibi tantiaquin mibi icsaid pauquec Esuquidistuded icsambocquidbimboec yec unëspanëdash. Aid tantiaquid icsho Esusën paucaid mibi nec. Adquid yec Icbon mibi tantiaquin nabanacpadomboen utsi tantiaquin nabanec bëdamboec tabadta. ¹³ Esuquidistu tantiaquid utsi icsambocquid nec quesa icta. Ëbi icsaid Esuquidistun paucac. Adomboembidi abi tantiaquid utsi icsaidbidi paucac quequin bëdamboen naban. Icsambocquid nec quiacbimboen icsamboen nabansho isun Nuquin Papan adomboembidi mibi chuiquin cuidoaindac. Ëbëdta Esuquidistun paucaid nec quequin utsi tantiaquin nashumënquid icquin icsambocquid nec quiacbimboen icsamboen nashuntiapimbocquid mibi nec.

Esus tantiaquid nebi quequin ambi tantiacpadomboen nabanquin isme quiaid

¹⁴ Utsibo, Nuquin Papan bacuë nebi, qeshun ¿Icbon chiaid nainquiocquina utsi bēdambo mimbi icmepadi? Padenquo. ¹⁵ Esus tantiaquid abi dasiuidtebēd pete nibēdquid, Bec cho, qesho ¹⁶ menenquiocquin, Nidec nid. Dashcute bedash dasiuidta. Adembidi pete bedshun codocashun peta, ¿mimbi cacta bēdambo icpadic? Padenquo. ¹⁷ Adembidi, Nuquin Papan bacuë nebi, qeshun Icbon chiacpadomboen naisa Icbon bēdambo icmiaidpenquo nec. Nuquin Papan bacuë nebi, qeshun naisa Nuquin Papa yacno puduedtiapimbo icoaic.

¹⁸ Adnubien, Esus tantiaquid nebi, quec onqueuidequi tabadquid icnubi, Esus tantiaquid nebi, quec onquenquiocquin Icbon chiacpadomboen nabanquidquo iquec. ¿Mitsipaden aid daēdshun tantiacpadomboen mimbi tantieque? Chui. Tantuanu, quequin mimbi chuitsiac.

Adoalui, Esus tantiaquid nebi, quequimbi Nuquin Icbon chiacpadomboen naisa naden chuitsiambi. ¿Nuquin Icbon chiacpadomboen nainquiocquin mitsipaden mimbi tantiaid mimbi tantiamepe? quetsiabi adquid chiec. Mimbi ambi chiacpadomboen nainquiocquin ismetiapimbocnobi, Esus tantiaquid nebi, quequin chienquiocquimbi Esusēn chiacpadomboen naquin mibi ismembī, caimbi. ¹⁹ Nuquin Papa Abentsēcquiobi iquec, quequin mimbi tantiec. Aden tantiaid bēdambo iquec. Adembidi, Nuquin Papa Abentsēcquiobi

iquec, quequin mayan icsatedishun tantiaoaic.
Aden tantiaquin niacquido yec uëdëquec.

²⁰ Icsamboen mimbi tantieque. Tantia.
Chuinu. Nuquin Papa Abentsëcquiobi iquec,
qeshun Icbon chiacpadomboen naisa yec,
Icbo tantiaquid nebi, quetiapimbo iquec.

²¹ Nuquin Papa tantiembi, qeshun ambi
chiacpadomboen naquidquio icpampid chuinu.
Tantia. ¿Abadauan ëbi tantiaquidquioda neque?
Tantianu, qeshun, Min mado abentsëc mibi
cudasaidquio ëbi tantiaquin cuesuneshun
tauita, cac Abadauanën Nuquin Papan chiaid
niacmane qeshun tauinuequin aton mado
abentsëc setsempampic. Chështempi sanandosho
isun, Padi. Chën. Ëmbi chiacpaden nanuesho
mibi bëdambo iquec, quequin mibi bëdamboen
isembi, ¿quequin chienquioda Nuquin Papan
icpampic?

²² Abadauan Nuquin Papan chiaid
cacuidenquio yec, Con Icbo Nuquin Papa
nec, quec abi onquiacpaden ismepampic.

²³ “Mimbi tishmiaidën tishmiaid dadpenquioshë
iquendac,” quequin chiondashumbic Nuquin
Papan yuecshun adembidi: “Min mado abentsëc
cuesuneshun tauita,” quequin chuioaqui, Nuquin
Papa abimbo chuiquidquio nec, qeshun ambi
chiaid niacchitomane quequin, Abadauanën aton
mado abentsëc setsempampic. Adosho isashien
Nuquin Papa, “Ëbi tantiaquin naquidquio
Abadauan nec. Adquid con matsesquio aidi
nec. Aden aidi tantiaquin ëmbi yuecquiocshon
nanuequin tantiaid Abadauan chiembi,”
quepampic Nuquin Papa.

24 Nuquin Papan bacuë nebi, queshun ambi chiaid naquidquio Nuquin Papa tantiaquidquio nec. Nuquin Papan bacuë nebi, queshun ambi chiaid naisa niacquid nec. 25 Adashic, Nuquin Papan chiaid tantiashun naquid utsi icpampic. Aidi isadaidbon chidopenquio, Daba cuëmëdquid, dada dadpen chudmequid icpampic. Isadaidbon Icho nadatiambocquid nec, quesho tantiashien, Adquid abu nidaidbëdta aidënquiocquid Icbobidi nec, quequin Daban tantiapampic. Aden tantiaquin Daban matses cuesunenuequido isadaidbo abia puduedquin isquid chosho, Nadatiambocquidën matses nec, queshun abi yacnouidtsëqui Daban puduedmepampic aton matses ismenquiocquin. Aden puduedmequin nadomboen tantiapampic. Abi puduedmequidbëd icquido cuesunenquiocpec, quequin Nuquin Papan tantiamiacpadomboen omposhon podqued utsin nidmepampic. Aden nidmiac yuecash isadaidbo dadpen cho-chonobi abia choamboedën chuibocpadquiobi Dababëd icquido cuesunianenquio yec isadaidbobëd icquidobimboec isec tabadpampic. 26 Nuquin Papa tantiaquid Daba yanshun bëdamboen nasho isun mënchicaid Nuquin Papan con matses caidbëd tabadpampic. Padnuen, Esus tantiaquid nebi, queshun Icbon chiacpadomboen naisa cuëshëdacimboec tabadec.

3

Anan icsamboen chiec onquiaid icsa ënta quiaid

1 Utsibo, Nuquin Papan chiaid chuibanquid dadpen iquenquioctiad. Nuquin Papan

chiaid tantiamenu, quequin ambi chiaid-penquiocnoc chuibanquid abi yacno chosho isun Nuquin Papan comapenen cuidendac.

² Chuibanquidtedishun chua-chuatsêquien chuibantsec. Nuquin Papan chiaid cuembo chuibanquid yec icsaisa yanec adquid. Bëdamboec tabadaid uesquin tantiaquin ismequidquio adquid nendac.

³ Cabayo anêshquin dëchëdëdcash uidën uash tsadquin nidmec. Aden uidën uaquin bidiacmec.

⁴ Adembidi uncaten cano dapa tsibidiacoaic. Cunquequidën comapenen bëcunetiadquiocnobi adembidi icbon nidmec.

⁵ Cabayo canobidi nua icnuc abi bidiacmete aniactsec iquec. Adecbidi icbo nua icnuc aton ana aniactsec iquec. Aniactsecquidi oncamequin icbon ambi naid dadpen comapenen chuibanec. Adembidi oncamequin onquiaid icsa chuibanec. Nëdënquiaid dëtsisidash badedquio nidacbimboec onquiaid icsa badedquio nidoaic.

⁶ Ana onquiaid icsa chuibanacpaden nabanec adecbidi icsabudquiec icbo. Adquid mayan icsan yua iquec adequi icsate bunec.

⁷ Nidaidën capuquid podochoquidbidi matsesën yuampicpaden abi yuaid iquec. Yua queneshash cuenenquiocquid.

⁸ Ad yenquio ana iquec. Quenenenquio yec ana onquebudec. Onquiaid icsa adecbidi ënëdtiapimbo iquec. Ana onquiaid icsa tantiabanec adecbidi icsabudquiec tabadendac.

⁹ Nuquin Icbo bëdambo iquec, queshumbic ana icbon, Nuquin Icbon uaid matses icsambo iquec, quequin chuibanoaic.

¹⁰ Ana shëcuën utsi bëdamboen chuishumbic utsi icsamboen

chuoiaic. Aden nuqui chienquoio ictiad. ¹¹ ¿Acte batapenquiocquid choaidënuësh batambocquidta chopadic? Padenquoio. ¹² Adecbidi ¿cuëte bacuë batambocquidën ëshë bëchi chopecta dëyuctic? Padenquoio. Adecbidi, ¿Isitodo dataniadaidën bacuë batambo yecta dëyucpadic? Padenquoio. Aidi adesa yacpadquieç Esus tantiaquidën ana shëcuën utsi bëdamboen chuishun utsi icsamboen chiesia ictiad.

¿Tsutsi Nuquin Papan chiaid tantiabenquidquo icpec? quiaid

¹³ ¿Tsutsi Nuquin Papan chiaid tantiabenquidquo icpec? Adquid yec comapenen Èsus tantiaquid nebi, quenquiocquimbi bëdamboec tabadquin ismequid utsi-utsien ma icmebampanuna. ¹⁴ Utsin tantiamenushe queshun ëmbia chiacpadomboen ma napanu quesa icta. Nuquin Papan chiacpadomboen nabanquin ismequid icta. ¹⁵ Adembidi, utsin dëniacnushe queshun namenun chuinuequid Nuquin Papan tantiacpadomboen pausunacmaid nec. Adquid mayan icsan tantiacpadomboen pausunaid nec. ¹⁶ Aden aidën icsamboen tantiacpadomboen abëd icquidon adomboembidi tantiec. Aden tantiec, Ûtsi dëniacnu, quiash utsi-utsiec dëniacnuequido dadpen yanec. Adquid dadpen icnuc chuiquid dapa tantiate bunesa icpec. Cuesnante bunquieç. Ad icnuc icsateuidi bunquid yampec. ¹⁷ Nuquin Papan tantiacpadomboen pausunaid ad yenquoio iqueç. Ambi tantiacpadomboen pausunaid yec utsibëd bëdamboec tabadquid iquendac. Adembidi utsi

tantiaquin nashunquidquo icoaindac. Adembidi
 ëbëdtan nabanec cho cac nabanendac. Adembidi,
 Icsambocquid nec, quenquiocquin bëdamboen
 nabanquin ismendac. Adembidi, Esus tantiaquid
 nebi, abi quiacpadomboen bëdamboen naic.
 Adecbidi utsibo chiec muaisa nendac. ¹⁸ Ambia
 tantiaquid utsibëd bëdamboec tabadquin ismiac
 adecbidi utsibëd bëdamboec tabadquid dadpen
 yanendac.

4

*Ëbi nua pausun, quequin chiash Nuquin Papan
 dayunquo tsadta quiaid*

¹ ¿Atotsi quiash Esus tantiaquido cuididianante
 buncuededpec? Mibi icsate bunacpadequi mibi
 cuididianante bunec. Aiduidquo tantiabude-
 qui mibi chushcanancuededec. ² Nëid bunebi,
 queboedëmbi bedtiapimbo yanquin mimbi cue-
 sunec. Adecbidi, Utsi dëniacnu, quiash chush-
 cananec. Mimbi naiduidi naquin Nuquin Papan
 tantiacpaden naisa mibi nec. ³ Aden naisa icquin
 Nuquin Papan chiaid niacmane quenquiocquin
 aidi mimbi chiec. Adec icsanueshun chuisho
 Nuquin Papan mibi menetiapimbo iquec.

⁴ Mimbi inaiduidi chudenquo yacpadquiequi
 Nuquin Icbouidi tantienquo yec Esus tantiesan
 icsate bunquin nacpadomboen mimbi nadenec.
 Adquid yec Nuquin Papa chieshënuquid nec.
⁵ Adenquiocquin Esus tantiaquo isun aton
 Mayan Nuquin Papan Esus tantiaquidtedi
 meniac bëdamboec tabadec. ¿Atotsieshun Esus
 tantiaquid aidi menepec quepecta mibi ique?
 Nad iqueque. Tantia. Chuinu. Con bacuë

nec, quequin aton Mayan Nuquin Papan Esus tantiaquido menec. Aden tantiaquin meniac, ¿Esuquidistu tantiaquido cudasquin dëcatenquioda aidën icpec? ⁶ Aidëmbi abi chieshenquio yacpaden tantiamebanac icsamane quiash chieshenquio yec bëdamboec tabadta. Nuquin Papan dada uamiampid nad iqueque. Tantiata: “Nuquin Papan chiaid niacquin ambibi naid nasho isun pausuntiapimbo Nuquin Papa iquec. Icsaobi. Ëmbibi bëdamboen tantiatiapimbo iquebique. Ëbi tantieme, Papa, qesho Nuquin Papan nua pausunac aton icbo chieshënenquiocquid iquendac adquid.”

⁷ Aden Nuquin Papan chiaid icnuc, Icsaobique. Mibia Yampidën ëbi nua pausun, Papa, quequin chiash Nuquin Papan dayunquio tsadacbimboecquin ambi chiaid tantiata. Nuquin Papa chieshënnquid mayan icsan yuadenda. Adquidën yuatiapimbo iquebique. Nuquin Papan chiaidquio nabanu, qeshun nabanuc mayan icsa cuenendac. ⁸ Aton dayunquio tsadquidbimboecquidbëd tabadquidquio Nuquin Papa nec. Icsash uano tsadquid icboedi bëchishash acten dapanudacbimboen mimbi tantiaid icsa ënta. Adash, Tantiaid bëda pausumenu, quiash Nuquin Papan dayunquio tsadacbimboecquin chieshenquiocquin ambi chiaiduidi tantiadeneta. ⁹ Aden tantiec tsadboedi, Ëmbibi tantiemi, quec Nuquin Papa chieshënnquidën dayunquio uano tsadashic, Con Icbo tantiec unësquio iquebi, quiash shubiec mamënenquio yec tsadta. Mibibi uano tsadquid yash unësacbimboec icboedi

choec isadcuenac bimboec Nuquin Papan dayunquo tsadac bimboec yec chieshenquo yec bēdamboec tsadoata. ¹⁰ Uano icboedi choash, Ēbibi icsaobi. Nēbi icsate bunenquo iquebi. Mimbi chiacpadtiadquo iquebi, Papa, quequin chui. Aden mimbi chuisho tantiash, Puduedash nēmo ebēd tsadac bimboec mibi yanoaic, quependac Nuquin Papa.

¹¹ Utsibo, Esus tantiaquidtedi min utsibimboecquid nec. Mibēd icquid icsamboec chuinanenquo yacpadquiec Esus tantiaquid utsibēd icsamboec chuinanenda. Esus tantiaquid icsamboec chuinanquid Nuquin Papan chiaid niacquid nec. Aden chuiquid Nuquin Papan chiaid icsamboiquec quiac bimboecquid nec. ¹² Nuquin Papa Chuiquid Dapa Abentsēcquiobi iquec. Ambi chiacpaden naquidquo nec. Nuquin Papa abitedi Isquidquo Abentsēcquiobi nec. Aden isquin: Nēid icsambocquid nec. Nēidien bēdambocquid nec, quequin Chuiquidquo abentsēcquiobi aidi neoaic. Adquid icquin ambi chiaid nabanquid abēdi tabadmec. Ambi chiaid niacquidien abēdi tabadmenquiocquin uquē nēsecaindac. Nuquin Papan ambi chiacpadomboen naquidbēdtabi ambi chiacpadomboen naisa isquidquo icquin ambi isacpaden cuidendac. ¿Adquidbidida mibi ne? Padenquo. Adquidpenquo icquin ¿atotsieshun, Icsambocquid nec, quequin mimbi chuipe?

Ma badiadshun nanun chiaid tantiesa neyoc, quequin chiaid

¹³ Tantaquidquo nebi, quiash, Piucquid bednuec seta abentsēc matamec chonoadec

nidebi, quequid chuinu. Tantia. ¹⁴ Ma adquid badiadshun nanun chiaid tantiesa mibi neyoc. ¿Tetsi seta matamec mibi tabadpe? Badiadbudnuc cuen-cuempambo yash badedquio nidacbimboec matses nidaidën tabadash adecbidi mibi nibëdanendac. ¹⁵ Naden nanu quenquiocquin nadembien tantiatiad: Nuquin Papa bunaid icnuc badiadash isedec nidebi, quetiad. Adecbidi, Nuquin Papa bunaid icnuc badiadshun tied neshcaimbi, quetiad. ¹⁶ Aden chienquiocquimbi mibi utsi dëniaquec onquiaid mimbi chiec. Aden chiec icsaic. ¹⁷ Nuquin Papan chiaid tantiembi, qeshun adomboen natiadquidi naisa iquec icsaic.

5

Na dadpen bedbanquin dayun uaquido chiaid

¹ Nëbi aton na dadpen bedbanquin dayun uaquido chiembique. Tantiata. Mibi unësun mimbi bedbanquin daëd uaid mimbi tantiaidquio buantiapimbo mibi iquendac. Aden mimbi bedbanquin daëd uaiduidtsëqui icsho isun Nuquin Papan mibi cuidendac. Adquid nebi, quequin tantiash shubita. ² Unësosh, quequin chiac mimbi dadpen dayun uaid nibënquin isac ënden chodquiac. Adembidi mimbi bëdaidquio dectanaid capishton ënden piac. ³ Min shocosh piucquid ënden chiuidac. Adecbidi min piucquid utsi ënden tiadac. Adenuidi tantiaquin bedbanquid unësaçsho abi yacno yuedquin, Bëdamboen mimbi naoc, quetiapimbo Nuquin Papa iquendac. Tanunënquio shubu nëdënquiash nibëdacpadquiec mimbi bedbanaid nibëdquiendac.

Adenuidi tantiaquin, Esus ëbi bedec chonoshe qeshun ¿Nuquin Papa yacno puduedmenun tsutsimbi Esuquidistu chuibampe? quequin tantienquiocquin mitsana dadpen bedbanshun mimbi dayun uaoc. ⁴Adembidi mimbi icsamboen naid utsi iqueque. Tantia. Min tied uaquido mimbi chono uaboedo bunec sidquec. Aidi mimbi menenquio yaid Esuquidistu tantiaquido Nuquin Papan tantiaido nec. Adembidi, Con tiedën caniquidtsen dayun uanu, quequin mimbi bedmiaido uëshquec bunec sidquesho Nuquin Papan, Nadatiambocquid Abentsëcshun tantiec. ⁵ Aido bunec sidquenubi chonoadenquiocquin nua pec mibi tsadec. Adec tsadquin min nami bunaiduidi tantiaquin mimbi bedbanoaic. Nua pec cubudac bimboen mibi bunaiduidi bedbanquin dadpen dayun uaquido mibi nec. Aden nabanquin bëdamboec tabadaid ismesa mibi nec. Adec tabadec unësash abi yacno mibentsëqui chosho Esuquidistu tantiamibocquid nec, quequin Nuquin Papan mibi isendac. Aden isquin mimbi chono uaido mimbi cuidacpadomboen aidëmbi mibi cuidendac. ⁶ Mimbi chiaid mimbi chono uaidon niaquenquiocquin nabanacshobi, Icsamboen mimbi naoc, quequin daëdpactsëc mimbi menebampoc. Aden nabanec mimbi cunesuniac bimboec bunquiec chonoadequi unësposh.

Ma Nuquin Icbo chono quiash chieshesa icta quiaid

⁷ Nëbi utsibon chono uaido chuinu. Tantiata. Nuquin Icbo choec quequin tantiec chieshenquio yec tabadta. Nitsinash ma caninu quianec

pec nidash cainec icbo tabadec. ⁸ Adembidi, Nuquin Icbo ëbi bednuec choec, quec bēdamboec tabadquin caimbudta. ⁹ Adec tabadquin Esus choate cainec Esuquidistu tantiaquid utsibobēd chieshēnanenda. Adec utsibobēd bēdamboec tabadsho isun abitedi tantiaquidēnquo Chuiquid Dapan mibi menequin bēdamboen cuidendac. Adesain menenquiocquin cuidendac. Adembidi, Nēidēn bēdamboen naosh. Nēidēmbien icsamboen naosh, quequin ëbi Chuiquidēnquo chierendac, quec chieshenquo yec bēdamboec tabadta.

¹⁰ Utsibo, natiatequid icnuc Nuquin Papan chiaid ambi chuimiaido chieshenquiocpampic. Aidquo chuibanu. Tantia. ¹¹ Natiaid icnuc chieshenquiocsho isun Nuquin Papan bēdambo icmendac, quequin nuqui tantiondaid nendac. Natiaic cametequid icnuc Nuquin Papa chieshēnenquiocquid Obo icpampic. Aton na dadpen icboedi icsatequid utsiutsiectsēcquiecquidēn uesac nibēdquiocsho isash, Con nabēd con nabo nibēdnuc Nuquin Papa bēdambo iquec, quec chieshenquiocpampic Obo. Adquid icsho isun daēd uaquin Nuquin Papan meneoapampic. Matses tantiaquin naquidquo Nuquin Papa nec, quequin ¹² abimbo chuiquidquo icta. Utsin: ¿Ada naden natsia? cac, Ai, quiacpadomboen nabanta. Adembidi, Padenquo, quiacpaden nabanoata. Mua uanec onquequid Nuquin Papan cuidendac.

Nēidic bēdampec quequin abimbo tantianuc quiaid

¹³ ¿Natiambo icsatequid icnuc dayactiapimbo icquidta icpec? Adquidēnquo Nuquin Papa

chuitiad. ¿Bëdambo iquebi, quec tsadquidta icpec? Adquid Nuquin Papan naid chiec cuëdëntiad. ¹⁴⁻¹⁵ ¿Aton dada icsabudquidta icpec? Adquidën ambia Esus tantiaquido chuiquin, Nuquin Papa ëbi chiec cho, catiad. Adsho tantiash choshon icsabudquid tantiaquin anoshonuidi Nuquin Papa chuidoneta. Aden chuidoneshun cuëte bacuë ënë chinshun dashunquinqin, Mimbi utsibo bëdamenëdacpadomboen mimbi tantiacpaden nëidtsen bëdame, Icho, quequin chuita. Aden Nuquin Papa chuinun mibi icsaid icnuc, Icsaobi, quequin mimbi naid Nuquin Papa chui. Adembidi dada icsabudaid chuiquin, Mibi icsaid icnuc Nuquin Papa chui ma mibi paucnu, quequin chuita. Aden ambi naid icsa chiacsho paucacpaden ma aton dada bëdamepanuna. ¹⁶ Abi icsaid uesquin Nuquin Papa chiash bëdamboec tabadendac. Adquidën chiac dada icsambocquid Nuquin Papan bëdamendac.

¹⁷ Edias nuquibimboecquid matses icpampic. Nuquin Papan nua pausunac Nuquin Papan tantiacpadomboen Ediasën tantiapampic. Adquid icquin, Ue secamenda, Papa, cac adecbidi seta 3ted matamiash seta utsi choabicnuc ue sequenquio icpampic. ¹⁸ Adembidi, aidëmbi yuecshun, Ue secame, Papa, cac ue sequenuc tiedën caniquid canipampic.

¹⁹ Esus tantiaquidën Nuquin Papan chiacpadomboen nabamboedi adoesa utsi-utsiec yantsiash. Adsho isun Nuquin Papan chiaid tantiamequin ambi icsamboen tantiaid chuibanac Nuquin Papabëd yacbimboec icoaindac. ²⁰ Aden mimbi chiac chieshenquio yec

tabadsho isun Nuquin Papan uquë nësiatiapimbo
adquid iquendac. Adecbidi abi icsaid bëpiscudoaic
Nuquin Papa.

Padi. Mibi tantiaquin aidted dada uaombi.

Esuquidistu Chuiquin Tantiamete New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

446da786-5bd1-5ffa-85e2-9eff4052cf8b